

EKATEKISIMU ENYENG'E

The Shorter Catchism in Ekegusii

- Okob. 1** Eganga enene ya mwanabanto nereri?
Okoi. Eganga enene ya mwanabanto nokomoa Nyasae obonene na komogokera kare na kare.
- Okob. 2** Ngochika ki Nyasae atoete kogotora bunu etogwenerete komoa obonene na komogokera ere?
Okoi. Ring'ana ria Nyasae, rire ime y'amariko ase Okobwatana Ogokoro na Okobwatana Okoyia, nakwo ogochika gwoka kogotora bunu etogwenerete komoa obonene na komogokera ere.
- Okob. 3** Ninki amariko amachenu akworokereria mono?
Okoi. Amariko amachenu nigo akworokereria mono eki mwanabanto agwenerete kwegena koreng'ana na Nyasae, na mbokoreri ki Nyasae aganetie ase mwanabanto.
- Okob. 4** Nyasae ninki?
Okoi. Nyasae nomoika, tari korengoka, o kare na kare, na tari goonchoka, ase chimbwa chiaye chi'okoba, chi'obong'aini, chi'okobua, chi'obochenu, chi'oboronge, chi'obuya na echi'ekeene.
- Okob. 5** Nyasae mbareo goetania oyomo?
Okoi. Nareo oyomo bweka, Nyasae ore moyo na oyo bw'ekeene.
- Okob. 6** Abantu mbarenga bare ase Obonyasae?
Okoi. Abantu mbatato bare ase Obonyasae: Tata, Omwana na Omoika Omoichenu; na aba batato nigo bare Nyasae oyomo, bagwekaine ase okoba kwabo, bareng'aine nokobua na obonene.
- Okob. 7** Emeroberio ya Nyasae nereri?
Okoi. Emeroberio ya Nyasae nero eganga yaye ya kare na kare, koreng'ana n'obosemia bw'ogwanicha kwaye, ase ayio, ase obonene bwaye, konyora ochorire kende gionsi kiare gocha koba.
- Okob. 8** Inaki Nyasae agoikerania emeroberio yaye?
Okoi. Nyasae nigo agoikerania emeroberio yaye ase emeremo y'obotongi na oborendi.

Okob. 9 Emeremo y'obotongi ninki?

Okoi. Ase emeremo y'obotongi Nyasae akaroisia ebinto bionsi korwa ase bosa, ase ring'ana ri'okobua kwaye, ase engaki y'amatuko atano na rimo, na bionsi ebiya mono.

Okob. 10 Inaki Nyasae atongete mwanabanto?

Okoi. Nyasae agatonga mwanabanto, omosacha na omokungu, ase omogwekano oye omonyene, ase obomanyi, oboronge na obochenu, na agambere ebitongwa.

Okob. 11 Emeremo ya Nyasae y'oborendi nereri?

Okoi. Emeremo ya Nyasae y'oborendi nigo ere okorenda na okogambere ebitongwa biaye bionsi na ebikoro biabo bionsi, ase obochenu, obong'aini na okobua.

Okob. 12 Ngekoro ki kia beene ki'oborendi Nyasae akorerete mwanabanto ekeri konya amotongire?

Okoi. Ekeri Nyasae konya atongire mwanabanto, agaso ase okobwatana kw'obogima amo nere, ase okomochika aigwere ase oboikeranu, na ase okomokania korwa ase omote bw'okomanya amaya na amabe, gataigwere namoe egesusuro ki'amakweri.

Okob. 13 Abaibori baito abatang'ani mbagendererete koba buna batongetwe?

Okoi. Abaibori baito abatang'ani bagatigwa ase obosibore bw'ogwancha kwabo abanyene, na bakagwa korwa ase okogenderera koba buna batongetwe ase ogokora ebibe mamincha ya Nyasae.

Okob. 14 Ebibe ninki?

Okoi. Ebibe nokoremerwa konde gwonsi kw'ogokorerania kw'amachiko a Nyasae, gose ogosaria amachiko aye.

Okob. 15 Nkebe ki keria abaibori baito abatang'ani bagwete korwa ase okogenderera koba buna batongetwe?

Okoi. Abaibori baito abatang'ani nigo bagwete korwa ase okogenderera koba buna batongetwe ase ogokora ekebe keria gi'okoria ritunda riakanetwe.

Okob. 16 Mwanabanto mbonsi bagwete ase ogosaria ogotang'ani kw'Adamu?

Okoi. Okobwatana kwaroigetigwe gati ya Nyasae na Adamu, tari ase Adamu bweka korende nase ororeria rwaye, mwanabanto bonsi bakorwa asare ase ororeria rwa botambe bagakora ebibe ime yaye na bakagwa amo nere ase ogosaria kwaye ogotang'ani.

Okob. 17 Okogwa oko ing'ai kwarentete mwanabanto?

Okoi. Okogwa oko gokarenta mwanabanto ase ebibe na emechando.

Okob. 18 Obobe bwa mwanabanto bonsi ase okogwa kwabo mborobi?

Okoi. Obobe bwa mwanabanto bonsi ase okogwa kwabo nigo bobwateranetie amamocho y'ekebe egetang'ani ki'Adamu, okoremerwa kw'oboronge obotang'ani na ogosareka gw'okoba kwaye gwonsi, (na ebi bitato nigo bikorokwa Obobe Obotang'ani,) amo n'ogosaria gwonsi gokorwa ase obwo.

Okob. 19 Emechando ya mwanabanto bonsi ase okogwa kwabo, ninki ebwateranetie?

Okoi. Mwanabanto bonsi ase okogwa kwabo bagasiria okobwatana gati yabo na Nyasae, na nigo bare inse y'endamwamu yaye na okoragereria kwaye ebio bikorenta emechando yonsi y'obogima obo, amakweri, na egesusuro gia Cheanamu kare na kare.

Okob. 20 Nyasae natigete mwanabanto bonsi basire ase ebibe na emechando?

Okoi. Korwa kare na kare, koreng'ana n'ogwancha kwaye gwoka, Nyasae agachora abanto gete banyore obogima bwa kare na kare; ase igo agaso ase okobwatana kw'eneema, erinde abatoorie korwa ase ebibe na emechando, na ababoorie n'Omobooria.

Okob. 21 Ning'o ore Omobooria bw'abachore ba Nyasae?

Okoi. Omobooria bw'abachore ba Nyasae nOmonene Yeso Kristo, oyorenge korwa kare na kare Omwana o Nyasae. Akaba mwanabanto na igo nigo are Nyasae na mwanabanto ase chingencho ibere chire ching'ao na omonto oyomo goika kare na kare.

Okob. 22 Inaki Kristo, oyorenge Omwana o Nyasae, abete mwanabanto?

Okoi. Kristo, Omwana o Nyasae, akaba mwanabanto ase okobwatania omobere bori na omoyo okorengereria gochia asere omonyene, ase okobekwa ase enda y'omwekungi Mariamu goetera ase okobua kw'Omoika Omochenu, na koiborwa nere, korende atabwati ebibe.

Okob. 23 Mbokoreri ki ara gatato Kristo buna Omobooria oito agoikerania?

Okoi. Kristo buna Omobooria oito nigo agoikerania obokoreri bw'omobani, na obw'omokuani na obw'omoruoti, ase ogwekeyia kwaye na ase okoimokererigwa igoro kwaye.

Okob. 24 Inaki Kristo agoikerania obokoreri bw'omobani?

Okoi. Kristo nigo agoikerania obokoreri bw'omobani ase okoorokia gocha asetore goetera ase Ring'ana riaye na Omoika oye, enchera Nyasae agototooria.

Okob. 25 Inaki Kristo agoikerania obokoreri bw'omokuani?

Okoi. Kristo nigo agoikerania obokoreri bw'omokuani ase okwerua ara rimo koba ekeng'wanso, goisanekia oboronge bwa Nyasae na gotobwatania na Nyasae; na ase okogenderera gotosabera.

Okob. 26 Inaki Kristo agoikerania obokoreri bw'omoruoti?

Okoi. Kristo nigo agoikerania obokoreri bw'omoruoti ase ogotorenta inse yaye omonyene, ase ogotogambera na ase ogotorwanerera, na ase ogotanga na okobua ababisa baye bonsi abwo bare ababisa baito boigo.

Okob. 27 Ogwekeyia gwa Kristo naki kwarenge?

Okoi. Ogwekeyia gwa Kristo nigo kwarenge: okoiborwa kwaye, nagwo ase aake; okobekwa inse y'amachiko; okonyora emechando y'obogima obo; okonyora endamwamu ya Nyasae na okoragereria kw'amakweri y'omosalaba; ogotindekwa kwaye; na okogenderera koba inse y'okobua kw'amakweri ase engaki.

Okob. 28 Okoimokererigwa igoro gwa Kristo naki kore?

Okoi. Okoimokererigwa igoro gwa Kristo nigo kore: okoboka kwaye korwa ase abakure ase rituko ria gatato; okobogorigwa gochia igoro; ogoikaransa ase okoboko kwa borio kwa Nyasae Tata; na ogocha konachera Ense ekina ase rituko ri'omoerio.

Okob. 29 Inaki tokonyora okoboorigwa kwagoretwe na Kristo?

Okoi. Nigo tokonyora okoboorigwa kwagoretwe na Kristo ekero Omoika oye Omochenu ogotobekera okoboorigwa okwo.

Okob. 30 Inaki Omoika ogotobekera okoboorigwa kwagoretwe na Kristo?

Okoi. Omoika nigo ogotobekera okoboorigwa kwagoretwe na Kristo ase okorenta okwegena ime yaito, na igo otobwatania gochia ase Kristo ase okorangerigwa kogototooria.

Okob. 31 Okorangerigwa kogototooria ninki?

Okoi. Okorangerigwa kogototooria nemeremo y'Omoika o Nyasae. Ase enchera y'ogotoenekeria igoro y'ebibe baito na emechando yaito, ogotoigorera ebirengererio baito bitware obomanyi igoro ya Kristo, na ogokora ogwancha gwaito koba okoyia, nigo agotoebereria na otoa okobua komoboania Yeso Kristo, okorugwa bosa gocha asetore ase enchili.

Okob. 32 Mbitoki ki baria batoorigwe bakonyora ase obogima obo?

Okoi. Baria batoorigwe nigo bakonyora ase obogima obo: Okobarerwa oboronge, Ogokorwa koba abana ba Nyasae, na Ogochenwa, na ebitoki binde bikobwatana nabirobio.

Okob. 33 Okobarerwa oboronge ninki?

Okoi. Okobarerwa oboronge negegoro kia Nyasae ki'eneema yaye ya bosa, agwo ase agotwabera ebibe biaito bionsi, na gotwanchera intwe buna abanyaboronge ase obosio bwaye, rioka ase engencho y'oboronge bwa Kristo bokobarwa ng'a nobwaito, na twabonyora ase okwegena gwoka.

Okob. 34 Ogokorwa koba abana ba Nyasae ninki?

Okoi. Ogokorwa koba abana ba Nyasae negegoro kia Nyasae ki'eneema yaye ya bosa, agwo ase togwancherwa koba abana baye na gotwara oboronge bw'ogosesenigwa gwonsi kw'abana abwo.

Okob. 35 Ogochenwa ninki?

Okoi. Ogochenwa nemeremo ya Nyasae y'eneema yaye ya bosa, agwo ase togokorwa abayia kegima koreng'ana n'omogwekano o Nyasae, na kobuerwa mono na mono gokwa ase ebibe na koba moyo ase oboronge.

Okob. 36 Mbitoki ki ase obogima obo bikobwatana n'Okobarerwa oboronge, Ogokorwa koba abana ba Nyasae na Ogochenwa?

Okoi. Ase obogima obo, ebitoki bikobwatana n'Okobarerwa oboronge, Ogokorwa koba abana ba Nyasae na Ogochenwa nabio: okoenekerigwa kw'obwanchani bwa Nyasae, omorembe bw'ekerengererio kia ime, omogoko ase Omoika Omoichenu, ogokina ase eneema, na okoremereria goika omoerio.

Okob. 37 Mbitoki ki abegenwa bakonyora korwa ase Kristo ase engaki y'ogokwa kwabo?

Okoi. Ase engaki y'ogokwa kw'abegenwa, emioyo yabo nigo egokorwa emeikeranu ase obochenu, nerio kegima yaso a ase obonene, na emebere yabo kebwatanirie ase Kristo nigo egotimoka ime ye chimbeera chiabo goika okobokigwa.

Okob. 38 Mbitoki ki abegenwa bakonyora korwa ase Kristo ase engaki y'okobokigwa?

Okoi. Ase engaki y'okobokigwa, abegenwa mbabokigwe ase obonene, na Nyasae nabamanyekanie maiso marore ng'a nabaye bare na batari na komocha ase rituko ri'ekina, na mbasesenigwe kegima ase okomogokera Nyasae boikeranu goika kare na kare.

Okob. 39 Mbokoreri ki Nyasae aganetie korwa ase mwanabantu?

Okoi. Nyasae nigo aganetie mwanabantu aigwere ogwancha kwaye okwo koorokirie.

Okob. 40 Agwo omochakano ninki Nyasae aorogetie mwanabantu buna ogochika agwenerete koigwera?

Okoi. Agwo omochakano, ogochika okwo Nyasae aorogetie mwanabantu ase okoigwera kwaye nigo kwareng Amachiko y'Oboronge.

Okob. 41 Ing'ai Amachiko y'Oboronge abekire ase obweng'e?

Okoi. Amachiko y'Oboronge nigo abekire ase obweng'e ime y'Amachiko Ikomi.

Okob. 42 Obweng'e bw'Amachiko Ikomi mborobi?

Okoi. Obweng'e bw'Amachiko Ikomi nabwo, Twanche Omonene Nyasae oito ne chinkoro chiaito chionsi, n'emioyo yaito yonsi, ne chinguru chiaito chionsi, n'ebirengererio biaito bionsi, na twanche omoamate oito buna tweanchete.

Okob. 43 Ogochakera kw'Amachiko Ikomi nkoroki?

Okoi. Ogochakera kw'Amachiko Ikomi nigo kore ase amang'ana aya, "Inche ninche Omonene Nyasae oo, oyokorusetie ase ense ya Misiri, korwa ase enyomba y'obosomba".

Okob. 44 Ninki ogochakera kw'Amachiko Ikomi kogotworokereria?

Okoi. Ogochakera kw'Amachiko Ikomi nigo kogotworokereria ng'a ekiagera Nyasae nere Omonene na Nyasae oito na Omobooria, ase igo ntogwenerete torende amachiko aye onsi.

Okob. 45 Ogochika ogotang'ani nkoroki?

Okoi. Ogochika ogotang'ani nakwo, "Toba ne chinyasae chinde bosio bwane".

Okob. 46 Ninki keganeirie ase ogochika ogotang'ani?

Okoi. Ogochika ogotang'ani nigo gotoganetie tomomanye na tomoorokie Nyasae koba Nyasae bweka bori na Nyasae oito, na igo tomosasime na tomoe obonene buna egwenerete.

Okob. 47 Ninki gekanire ase ogochika ogotang'ani?

Okoi. Ogochika ogotang'ani nigo gokanete okwanga gose ogotasasima na ogotamoia Nyasae obonene buna Nyasae na buna Nyasae oito, na okoa ogosasima koria na obonene gochia ase onde bwensi, okwo kore okwaye gwoka.

Okob. 48 Ninki tokworokererigwa ase amang'ana aya, "bosio bwane", ase ogochika ogotang'ani?

Okoi. Amang'ana aya, "bosio bwane", ase ogochika ogotang'ani, nigo agotworokereria ng'a Nyasae, oyoroche ebinto bionsi, nigo akorora na kogechigwa mono n'ebibe bi'okoba n'enyasae ende yonsi.

Okob. 49 Ogochika gwa kabere nkoroki?

Okoi. Ogochika gwa kabere nakwo, Tobaisa gwekorera omogwekano gose okobwekana konde gwa kende gionsi kere igoro* ere igoro, gose kere ense ere inse ya igoro, gose kere ime y'amache inse y'ense. Tobaisa kobitung'amera gose kobikorera, ekiagera inche, Omonene Nyasae oo, ninche Nyasae bwe risemi, oyogotaarera obobe bw'abatata ase abana goika ekiaare kia gatato na egia kane ki'abwo bangechete; na oyokoorokia amabera ase chiribu chi'abwo banyanchete na bakorenda amachiko aane.

* engencho yaye: erioba agwo ase chinyoni chikoiruruka, erioba agwo ase risase, omotienyi ne ching'enang'eni bire, na Igoro agwo ase Nyasae na abamalaika bare.

Okob. 50 Ninki keganeirie ase ogochika gwa kabere?

Okoi. Ogochika gwa kabere nigo kogonetie twanche, toigwere na torende kegima, totari komenta kende gionsi ase, ogosasima gwonsi na emeyega yonsi Nyasae achikire ase ring'ana riaye.

Okob. 51 Ninki gekanire ase ogochika gwa kabere?

Okoi. Ogochika gwa kabere nigo kogokana ogosasima Nyasae ase emegwekano, gose ase enchera ende yonsi etachikiri ase ring'ana riaye.

Okob. 52 Ngencho ki chibwateranirie ogochika gwa kabere?

Okoi. Chingencho chibwateranirie ogochika gwa kabere nachio: okobua kwa Nyasae kw'ogotogambera, ogototwara kwaye, ne risemi riaye ase ogosasimwa kwaye.

Okob. 53 Ogochika kwa gatato nkoroki?

Okoi. Ogochika kwa gatato nakwo: Torikorera bosa erieta ri'Omonene Nyasae oo, ekiagera Omonene tagotiga komoa egesusuro oyokorikerera bosa erieta riaye.

Okob. 54 Ninki keganeirie ase ogochika kwa gatato?

Okoi. Ogochika kwa gatato nigo kogonetie obochenu na amasikani ekeru ogokorera amarieta a Nyasae, chikondo chiaye, chingencho chiaye, emeyega yaye, ring'ana riaye na emeremo yaye.

Okob. 55 Ninki gekanire ase ogochika kwa gatato?

Okoi. Ogochika kwa gatato nigo kogokana ogotasika gose ogokorera bobbe kende gionsi agwo ase Nyasae akwemanyekania.

Okob. 56 Ngencho ki ebwateranirie ogochika kwa gatato?

Okoi. Engencho ebwateranirie ogochika kwa gatato nero: ng'a nonya abasaria b'ogochika oko chingaki chinde bagotama egesusuro korwa ase mwanabanto, Omonene Nyasae oito takobatiga batame ekina kiaye kia boronge.

Okob. 57 Ogochika gwa kane nkoroki?

Okoi. Ogochika gwa kane nakwo, Inyora rituko ri'esabato, orirende ribe richenu. Amatuko atano na rimo okore emeremo yao yonsi, korende rituko ria gatano na kabere nesabato y'Omonene Nyasae oo: ase rirorio tokora emeremo ende yonsi, aye, gose omomura oo, gose omoiseke oo, omosomba oo omosacha, gose omosomba oo omokungu, gose chitugo chiao gose omomenyi ore ime y'ebiita biao. Ekiagera ase amatuko atano na rimo Omonene nigo

aroiyetie Igoro na Ense, enyancha na bionsi bire imeo; na agatimoka ase rituko ria gatano na kabere. Ase ayio Omonene agasesenia rituko ri'esabato, na akariatatanana ribe richenu.

Okob. 58 Ninki keganeirie ase ogochika gwa kane?

Okoi. Ogochika gwa kane nigo kogonetie okorenda ase obochenu ase Nyasae chingaki chiria abekire ime ye ring'ana riaye: nakwo ogoteba, rituko erimo rionsi ase amatuko atano na abere, ribe esabato enchenu asare.

Okob. 59 Ituko ki ase aya atano na abere Nyasae abekire ribe esabato ya kera echuma?

Okoi. Korwa omochakano bw'ense goika okobokigwa gwa Kristo, Nyasae nigo abegeite rituko ria gatano na kabere ri'echuma ribe esabato ya kera echuma; na korwa okobokigwa akabeka rituko ritang'ani ri'echuma, rigenderere goika omoerio bw'ense, erio rire esabato y'obokristo.

Okob. 60 Naki esabato egochenwa?

Okoi. Esabato nigo egochenwa ase ogotimoka ogochenu rituko erio rionsi, nonya nkorwa ase emeremo y'ense eye na okwegokia gw'ense eye ebio bire ebia boronge ase amatuko ande; na ogotumia chingaki chionsi ase ogosasima kwa Nyasae ase omosangererekano na ase abobisi, otatiga chingaki chi'ogokora emeremo egwenerete na ey'amabera.

Okob. 61 Ninki gekanire ase ogochika gwa kane?

Okoi. Ogochika gwa kane nigo gokanete ogotiga obokoreri boganeirie gose ogokora obokoreri otari korenda, na ogosaria rituko ase obworo, gose ase ogokora keria ekenyene kere ebibe, gose ase ebirengererio bitaganeirie, amang'ana ataganeirie gose emeremo etaganeirie igoro y'emereimo yaito y'ense eye gose igoro y'okwegokia gwaito gw'ense eye.

Okob. 62 Ngencho ki chibwateranirie ogochika gwa kane?

Okoi. Chingencho chibwateranirie ogochika gwa kane nachio: Nyasae ogotoa amatuko atano na rimo y'echuma ase emeremo yaito; ogotwara kwaye kwa beene kwe rituko ria

gatano na kabere; omobwekano oye; na ogosesenia kwaye kwe rituko ri'esabato.

Okob. 63 Ogochika kwa gatano nkoroki?

Okoi. Ogochika kwa gatano nakwo, Sika iso na nyoko, nario amatuko ao arabe amatambe ase ense eyio Omonene Nyasae oo agokoa.

Okob. 64 Ninki keganeirie ase ogochika kwa gatano?

Okoi. Ogochika kwa gatano nigo kogonetie okorenda ogosika, na ogokora obokoreri, ebio bire ebia kera oyomo aase abo ao ao na oboamate bwabo ao ao, buna abwo abanene, abwo abake gose abwo bareng'aine.

Okob. 65 Ninki gekanire ase ogochika kwa gatano?

Okoi. Ogochika kwa gatano nigo gokanete ogotiga gose ogokora kende gionsi mamincha y'ogosika na obokoreri ebio bire ebia kera oyomo aase abo ao ao na oboamate bwabo ao ao.

Okob. 66 Ngencho ki ebwateranirie ogochika kwa gatano?

Okoi. Engencho ebwateranirie ogochika kwa gatano neira y'obogima obotambe na ogosesenigwa ase baria bonsi bakorenda ogochika oko (onye bikoba ase obonene bwa Nyasae na obuya bwabo).

Okob. 67 Ogochika kwa gatano na rimo nkoroki?

Okoi. Ogochika kwa gatano na rimo nakwo, Toita.

Okob. 68 Ninki keganeirie ase ogochika kwa gatano na rimo?

Okoi. Ogochika kwa gatano na rimo nigo kogonetie ebinto bionsi bigwenerete ase okorenda obogima bwane na obogima bw'abande.

Okob. 69 Ninki gekanire ase ogochika kwa gatano na rimo?

Okoi. Ogochika kwa gatano na rimo nigo gokanete ogweita, gose okorusia obogima bw'omoamate one gotabwati oboronge, gose kende gionsi kebuate omoika bw'oboiti.

Okob. 70 Ogochika kwa gatano na kabere nkoroki?

Okoi. Ogochika kwa gatano na kabere nakwo, Totomana.

Okob. 71 Ninki keganeirie ase ogochika kwa gatano na kabere?

Okoi. Ogochika kwa gatano na kabere nigo kogonetie indende ogocheneka kwane na okw'omoamate one, ase okorengereria, ase ogokwana na ase ogokora.

Okob. 72 Ninki gekanire ase ogochika kwa gatano na kabere?

Okoi. Ogochika kwa gatano na kabere nigo gokanete ebirengererio bionsi bi'ogotacheneka, amang'ana onsi y'ogotacheneka na ebikoro bionsi bi'ogotacheneka.

Okob. 73 Ogochika kwa gatano na gatato nkoroki?

Okoi. Ogochika kwa gatano na gatato nakwo, Toiba.

Okob. 74 Ninki keganeirie ase ogochika kwa gatano na gatato?

Okoi. Ogochika kwa gatano na gatato nigo kogonetie okonyora kwa boronge na okogendereria kwa boronge kw'obonda na ebinto bi'obogima obo bire ebiane nebi'omoamate one.

Okob. 75 Ninki gekanire ase ogochika kwa gatano na gatato?

Okoi. Ogochika kwa gatano na gatato nigo gokanete kende gionsi getari kia boronge kegotanga, gose keratange, obonda gose ebinto bi'obogima obo bire ebiane gose ebi'omoamate one.

Okob. 76 Ogochika kwa kianda nkoroki?

Okoi. Ogochika kwa kianda nakwo, Torua oborori bw'oborimo mamincha y'omoamate oo.

Okob. 77 Ninki keganeirie ase ogochika kwa kianda?

Okoi. Ogochika kwa kianda nigo kogonetie okorenda na ogokinia ekeene egati ya mwanyabanto, na okorenda na ogokinia erieta riane ribe rigiya na eri'omoamate one, mono kegima ase okorua oborori.

Okob. 78 Ninki gekanire ase ogochika kwa kianda?

Okoi. Ogochika kwa kianda nigo gokanete kende gionsi kere mamincha y'ekeene gose kegosaria erieta riane rigiya gose eri'omoamate one.

Okob. 79 Ogochika kwa ikomi nkoroki?

Okoi. Ogochika kwa ikomi nakwo, Toganania enyomba y'omoamate oo, toganania omokungu bw'omoamate oo, gose omosomba oye omosacha, gose omosomba oye omokungu, gose eeri yaye, gose etigere yaye, gose kende gionsi kere eki'omoamate oo.

Okob. 80 Ninki keganeirie ase ogochika kwa ikomi?

Okoi. Ogochika kwa ikomi nigo kogonetie ogoisaneka kegima n'okoba kwane, n'omoika bw'oboronge na obw'obwanchani gochia ase omoamate one, na ase biria bionsi bire ebiaye.

Okob. 81 Ninki gekanire ase ogochika kwa ikomi?

Okoi. Ogochika kwa ikomi nigo gokanete ogotaisaneka gwonsi n'okoba kwane, ogotwara ribero gose ogoichanigwa ase engencho y'okogenderera buya kw'omoamate one, na ogotwara okogania na ogwancha ebio bire ebinene goetania ekerengo kegwenerete ase kende gionsi kere ekiaye.

Okob. 82 Monto onde nare okonyara korenda amachiko a Nyasae boikeranu?

Okoi. Korwa okogwa kwa mwanyabanto, monto taiyo korwa ase Adamu ase ororeria rwa botambe okonyara, ase obogima obo, korenda boikeranu amachiko a Nyasae, korende kera rituko nigo akoyabuna ase ebirengererio, amang'ana na ebikoro.

Okob. 83 Ebibe bionsi mbireng'aine ase obobe bwabo?

Okoi. Ebibe binde ase birobio ebinyene, na koreng'ana n'okoba kwabo ao ao, nigo bire okogechia okonene goetania ebinde ase obosio bwa Nyasae.

Okob. 84 Ngesusuro ki kera ekebe kegwenerete konyora?

Okoi. Kera ekebe nigo kegwenerete konyora egesusuro ki'endamwamu ya Nyasae na okoragererigwa kwaye, ase obogima obo naboigo ase boria bogochi-gocha.

Okob. 85 Ninki Nyasae aganetie korwa asetore, egere totame korwa ase endamwamu yaye na okoragererigwa kwaye, ebio togwenerete konyora ase engencho y'ebibe biaito?

Okoi. Gotama endamwamu ya Nyasae na okoragererigwa kwaye ebio togwenerete konyora ase engencho y'ebibe biaito, Nyasae nigo atoganetie totware okwegena ime ya Yeso Kristo na ogoonchoka, na totumeke n'omokia chinchera chia isiko chionsi echio Kristo agotumeka gotorentera ebitoki bi'okoboorigwa.

Okob. 86 Okwegena ime ya Yeso Kristo ninki?

Okoi. Okwegena ime ya Yeso Kristo neneema y'ogotooria, agwo ase tokomonyora Yeso Kristo na gotimoka asare bweka ase ogotooreka, buna akorugwa gocha asetore ase enchili.

Okob. 87 Ogoonchoka ninki?

Okoi. Ogoonchoka neneema y'ogotooria, agwo ase omonyabibe, korwa ase okwegwa ng'a nomonyabibe are bori, na korwa ase okorora amabera a Nyasae are ime ya Kristo, nigo agotiga ebibe biaye, oonchokera Nyasae, kare n'obororo na obigechete, kare n'eganga yonsi na omokia bw'oboigweri oboyia.

Okob. 88 Inchera ki chikororekana echio Kristo agotorentera ebitoki bi'okoboorigwa?

Okoi. Chinchera chikororekana na echia botambe echio Kristo agotorentera ebitoki bi'okoboorigwa nachio emeyega yaye, mono kegima Ring'ana riaye, chisakramenti, na ogosaba; ebio bionsi bigokorwa koba n'okobua ase ogotooria abachore.

Okob. 89 Naki Ring'ana rigokorwa koba n'okobua ase ogotooria?

Okoi. Omoika o Nyasae nigo ogokora ogosoma kwe Ring'ana, na mono kegima okorandia kwe Ring'ana, koba n'okobua ase ogotooria, ase okobaenekeria abanyabibe ng'a nabanyabibe bare bori na kobaonchora, na ase okobaagacha ase obochenu na okoremigwa, goetera ase okwegena.

Okob. 90 Naki Ring'ana rigwenerete gosomwa na koigugwa, egere ribe n'okobua ase ogotooria?

Okoi. Egere Ring'ana ribe n'okobua ase ogotooria, goika toritegerere n'omokia, n'okwearigania na ase ogosaba; torinyore ase okwegena na obwanchani; torigache ase chinkoro chiaito; na torikore ase obogima bwaito.

Okob. 91 Naki chisakramenti chigokorwa koba n'okobua ase ogotooria?

Okoi. Chisakramenti nigo chigokorwa koba n'okobua ase ogotooria, tari ng'a nchibwate okobua konde gwonsi ime yabo gose ng'a oria ogochirua nabwate okobua konde, korende rioka, ngoetera ase ogosesenia gwa Kristo na ogokora kw'Omoika oye ase baria bagochinyora ase okwegena.

Okob. 92 Esakramenti ninki?

Okoi. Esakramentinsenemo enchenu y'ogosasima yachagetwe na yakong'etigwe na Kristo, agwo ase, goetera ase ebimanyererio ebio bikoigugwa n'omobere, Kristo na ebitoki bi'okobwatana okoyia nigo bikoookigwa, biabekwa omouri, na biaegwa abegenwa.

Okob. 93 Chisakramenti chi'Okobwatana Okoyia nchirichi?

Okoi. Chisakramenti chi'Okobwatana Okoyia nigo chire Ebatiso na Emesa y'Omonene.

Okob. 94 Ebatiso ninki?

Okoi. Ebatiso nesakramenti, agwo ase togosibigwa n'amache, ase erieta ria Tata, na eri'Omwana, na eri'Omoika Omochenu. Ogosibigwa okwo nigo gokoookia na kwabeka omouri okobwatanigwa gwaito gochia ase Kristo, na okonyora gwaito kw'ebitoki bi'okobwatana kw'eneema, na ng'a ntogwenerete koba ab'Omonene.

Okob. 95 Nase barabi Ebatiso egwenerete korugwa?

Okoi. Ebatiso tegwenereti korugwa ase bande bonsi bare isiko y'ekanisa ekororekana, goika baorokirie okwegena kwabo ime ya Kristo na oboigweri bwabo asare; korende ebing'werere bi'ababwatani b'ekanisa ekororekana mbagwenerete kobatiswa.

Okob. 96 Emesa y'Omonene ninki?

Okoi. Emesa y'Omonene nesakramenti, agwo ase, goetera okorua na okonyora omogati na edivai koreng'ana n'ogochika gwa Kristo, ogokwa kwaye nigo gokoorkigwa. Abakoyeria ase okwegena nigo bagokorwa koba abakonyora omobere oye na amanyinga aye, ase enchera ya kemoika tari ase ekemobere; boigo banyora ebitoki biaye bionsi, erio baragerigwa kemoika na bakina ase eneema.

Okob. 97 Ninki keganeirie ase omonto erinde agwenere koegwa Emesa y'Omonene?

Okoi. Omonto koria Emesa y'Omonene ase enchera egwenerete goika erenge igoro y'obomanyi bwaye ase ogwatanana omobere bw'Omonene, igoro y'okwegena kwaye ase okomoria, igoro y'ogoonchoka kwaye, igoro y'obwanchani bwaye na igoro y'oboigweri bwaye oboyia; erio tabaisa gocha buna etagwenereti ase okoria na okonywa ekina.

Okob. 98 Ogosaba ninki?

Okoi. Ogosaba nokorenta ase Nyasae okogania gwaito kw'ebinto biancheire ase ogwancha kwaye, ase erieta ria Kristo, na okoorokia ebibe biaito, na ogoaka ng'a mbuya mono ase ogoseseneka kwaye gwonsi.

Okob. 99 Ninki Nyasae atoire ase ogotoraa ase ogosaba?

Okoi. Ring'ana rionsi ria Nyasae nigo rire eri'engendo ase ogotoraa ase ogosaba, korende mono kegima enchera eria y'ogosaba eyio Kristo aorokereretie aborokigwa baye, nero botambe ekorokwa Ogosaba kw'Omonene.

Okob. 100 Ogochakera kw'Ogosaba kw'Omonene ninki kogotworokereria?

Okoi. Ogochakera kw'Ogosaba kw'Omonene, (okwo kore "Tata oito ore Igoro"), nigo kogotworokereria toche ang'e ase Nyasae n'ogosika ogochenu na ogosemeria, buna abana bagocha ase ise, oyokonyara na oyore ang'e gotokonya; na ng'a ntogwenerete gosaba amo n'abande na kobasabera barabwo.

Okob. 101 Ninki togosaba ase ogosorora ogotang'ani?

Okoi. Ase ogosorora ogotang'ani, (okwo kore "Erieta riao risikwe"), nigo togosaba ng'a Nyasae atobuere intwe na abande boigo, tomoe obonene ase ebinto bionsi agwo ase akwemanyekania; na ng'a naroberie ebinto bionsi biorokie obonene bwaye.

Okob. 102 Ninki togosaba ase ogosorora gwa kabere?

Okoi. Ase ogosorora gwa kabere, (okwo kore, Oboruoti bwao boche), nigo togosaba ng'a oboruoti bwa Saitani bosarigwe; na ng'a oboruoti bw'eneema bogenderere konenea, intwe abanyene na abande torentwe imeo na torendwe imeo; na ng'a oboruoti bw'obonene boche bwango.

Okob. 103 Ninki togosaba ase ogosorora kwa gatato?

Okoi. Ase ogosorora kwa gatato, (okwo kore, Ogwancha kwao gokoreke ase Ense, buna kogokoreka Igoro), nigo togosaba ng'a Nyasae goetera ase eneema yaye atobuere na atokore tobe togwancha ase okomanya, okoigwera na ogwekeyia ase ogwancha kwaye ase ebinto bionsi, buna abamalaika bagokora Igoro.

Okob. 104 Ninki togosaba ase ogosorora gwa kane?

Okoi. Ase ogosorora gwa kane, (okwo kore, Otoa intwe rero omogati oito koreng'ana n'ebetari kie rituko), nigo togosaba ng'a goetera ase ekegwa kia Nyasae kia bosa, tonyore egetari gesaine ki'ebinto ebiya bi'obogima obo, na tonyore ogosesenia kwaye nabio.

Okob. 105 Ninki togosaba ase ogosorora kwa gatano?

Okoi. Ase ogosorora kwa gatano, (okwo kore, Na otwabere chisira chiaito buna tokwabera abanyasira baito), nigo togosaba ng'a Nyasae, ase engencho ya Kristo, natwabere bosa ebibe biaito bionsi. Nigo tokoremigwa koboria ogosorora okwo onye goetera ase eneema yaye twanyareirwe korwa ase enkoro kwabera abande.

Okob. 106 Ninki togosaba ase ogosorora kwa gatano na rimo?

Okoi. Ase ogosorora kwa gatano na rimo, (okwo kore, Na totoraa gochia ase ogoteemwa korende otoboorie korwa ase obobe), nigo togosaba ng'a Nyasae atorende titoteemwa gokora ebibe, gose atosiire na atoboorie ekeru togoteemwa.

Okob. 107 Ninki ogokoorera kw'Ogosaba kw'Omonene kogotworokereria?

Okoi. Ogokoorera kw'Ogosaba kw'Omonene, (okwo kore, Naki oboruoti na okobua na obonene nebiao kare na kare, Amina), nigo kogotworokereria tonyore okoremigwa gwaito ase ogosaba korwa ase Nyasae bweka, na ase ogosaba gwaito tomotogie, goetera ase ogokwana ng'a oboruoti na okobua na obonene nebiaye. Na ase oborori bw'okogania gwaito na bw'okoenerigwa gwaito ng'a ntoigugwe, nigo togokwana, Amina.

Free Presbyterian Church of Scotland
Kenya Mission
PO Box 3403
Kisii
Kenya

www.fpchurch.org.uk